

元豐類集卷第二十

查溪裔孫才道行思儀彥叔刊

制誥

試中書舍人制誥三道

特進觀文殿大學士除節度使開府儀同三
司制門下錫之列壤顓師寵於藩維申以榮名視官
儀於宰路所以褒隆舊哲優異宗工維今古之通規
實邦家之盛典宜兼禮秩屬在耆英播告治朝用揚
孚號具官某莊毅足以任重肅哲足以視身有能斷
大事之明有克勤小物之慎以察微之智練達人情

以經遠之謀彌綸國躰中外宣力左右納忠今方內
靖嘉百揆攸叙助朕致此時廼之庸位特次於上公
職仍通於秘殿閱時已久加命宜殊是用處以名城
分建旄之寄屬均于台衮極備物之恩榮於戲顯有
功尊有德朕於崇獎近輔之心可謂至矣親百姓撫
四夷爾於將順朕志之義可不懋哉尚躰眷懷往祗
厥服

中書舍人除翰林學士制

左右侍從之官皆朕所訪問以獻納為職者也惟禁
林任親地密於夫經營庶務進退大臣未嘗不預
詢非獨治翰墨典訓辭而已故待遇之寵不與他學
士比其重如此非智能材譎拔出一時豈稱公選某
純明脩潔秉誼不回學有本原可以勗治躰文有師
法可以代予言是用擢於右垣使就茲位今寓內嘉
靖朝廷燕閒朕方明紀綱考制度以行之當世傳之
將來夫能協爾衷以輔朕志論思政理以著之謀猷
潤色斯文以見於號令待爾有當官之効以副予
懷之心其往懋哉以承厥叙

敕監司考覈州縣治迹詔

朕惟天之所以視聽者在民故朕之所以承天者以

夫民事爲九重夫能使吾民足於衣食安於作息無
愁怨嘆苦之聲有廉耻自重之誼者在夫州縣之吏
而已朕旣擇人付以茲任而尚憂夫方域之廣生齒
之衆吏或不明不良不能究宣恩德使達于下開導
群情使通于上是以置使分部屬之刺督而考覈幽
明甄別淑慝罕能務稱其職朕方憲于先王以正百
官之任使處其名必效其實夫比群吏之治而謹其
勸劓固朕之所孜孜而不敢怠也廉按之臣其體朕
意於夫治人之官審加察焉使純明備潔慈祥往薦
之吏無壅於上聞而昏庸汙漫苛薄媮僞之人不能
自匿庶夫事舉刑清和樂交於內外風移俗易忠厚
格於神明方虛朕心以觀汝效賞罰有典誼無敢私
其尚欽承朕言不食

曾肇轉官除吏部郎中左選

敕具官某尚書政本失其分職之日久矣朕紀官以
實而歸其常守故卽選甚高銓綜之司典領尤重爾
以學行材諳列職史筵宜進文階往祗厥叙朕方審
覈幽明而公於黜陟尚思勉勵以敏事功可

劉奉世吏部員外郎制右選

敕具官某尚書政本失其分職之日久矣朕紀官以

實而歸其常守郎於選部任屬尤重以爾閱試惟舊
為吏有方考擇於朝俾參厥叙朕方審覈幽明而公
於黜陟尚思勉勵以敏事功可

黃好讓戶部員外郎劉程戶部郎中制左曹

勅具官某田疇生齒之籍賦租課入之法郎於省闈
典領尤重邦之雋茂俾服厥官爾能敏於事功朕豈
稽於信賞可

王陟臣馬坑戶部員外郎制右曹

敕具官某耕歛補助之法溝防通塞之政郎於省闈
典領尤重邦之雋茂俾服厥官爾能敏於事功朕豈

稽於信賞可

劉摯禮部郎中制

敕具官某周書曰不惟其官惟其人則古今之正治
官得人固為急也義曹之於即位考擇其精爾以學
行器能策名儒館宜升階等往祗厥服朕方明於賞
勸以待群吏之成爾尚懋于厥脩庶能康朕之事可

王子韶禮部員外郎制

敕具官某周書曰不惟其官惟其人則古今之正治
官得其人固為急也儀曹之於即位副貳所屬考擇
其精爾以博學多聞冊名儒館宜升階等往祗厥服

朕方明於賞勸以待群吏之成爾尚懋于厥脩庶能
康朕之事

潘良器兵部員外郎制

敕其官某朕高郎吏之選以進天下之材七兵之曹
名秩甚寵稽于有衆屬爾之能其尚懋于厥功朕方
明於賞勸可

胡援壯紘刑部郎中

敕其官某為郎居中時之妙選邦憲輕重典領惟艱
朝之雋良俾佐吾事夫刑期于無刑此朕志也尚思
明慎以稱厥官可

范子奇工部郎中高遵惠員外郎制

敕其官某宮室城堉程匠度材之事郎於隍部其選
甚高詢求在廷爾材惟允朕方董百工而康庶務爾
尚勤風夜而能厥官可

高遵惠改云副
貳之選甚高

王祖道司封員外郎制

敕其官某封爵之恩施於內外所以親親尊賢國之
典也總領之任郎選甚高明揚爾能俾踐厥位朕方
正名以稽郡吏之治而議其勸懲爾尚欽哉以敏來
効可

穆珣司封郎中制

敕具官某論功烈定勲級所以寵士大夫而勵其志也主以郎吏禮秩甚殊僉曰汝能宜正厥序夫正名者固將考其實也尚有信賞待汝計功可

蔡京范珣考功員外郎制

敕具官某計群吏之課而議其誅賞郎於天臺任屬尤重維時髦士宜服寵名使殿最允而功用興待汝能稱其職可不勉哉可

陳向度支員外郎制

勅具官某財用多寡之數物產豐約之宜司度之曹典貳為重爾惟幹敏宜服厥官夫能下寬齊民而上足經費朕方勵精庶政之日爾尚悉其猷為可

晁端彥金部員外郎制

敕具官某財用金寶有出納之政權衡度量有制作之法司珍之任實典治焉僉曰爾材宜在茲位國有陟明之典待爾善於其官可

韓正彥倉部郎中制

敕具官某倉庾賦入之政祿廩調助之法臺郎典領列於右曹為官擇人爾往惟允夫能善於其職固將圖爾之勞可

趙令鑠祠部郎中制

敕具官某禮莫大於祭蓋事神者人道之極也祠曹所領躰莫重焉爾惟精明宜服厥位其思任職以稱予奉天地宗廟兢兢之意焉可

徐禧御史中丞制

勅朕正名以定群臣之位辨位以責庶務之實矧風憲之官紀綱所屬曷可以不明其任哉具官某強敏仁篤學通古今擢典訓辭遂持邦法宜專分職以應新書是用掇自右垣仍其階品俾爾納忠宣力得壹意於中司以董齊百工而肅正內外庶余之作則更制罔或不虔在爾懋哉知其所守可

何洵直文及甫太常博士制

敕具官某奉常禮樂所出博士議論之官爾以藝文列於冊府宜升階品往祗厥叙夫能據經之說適今之宜不為曲學之阿爾尚薦於所守可

黃寔太常博士制

敕具官某奉常禮樂所出博士議論之官爾以能聞朕用分命夫能據經之說適今之宜不為曲學之阿爾尚薦於所守可

趙君錫宗正丞制

敕具官某公室遠近之屬譜錄攷序之政主以列卿

不用他族蓋自漢始迄今循行丞於厥官參贊為重
爾辭學之敏列職書林宜進文階往祇厥服大睦九
族以刑萬邦此朕志也爾尚懋于厥守庶以承朕之
仁可

劉蒙御史臺主簿王子琦太常寺主簿制

敕具官某吏之有屬所以相成句稽簿領之書交脩
官守之事往從憲府尚懋爾勞可

王子琦改憲府作卿

鐸張崇翟思邵剛大學博士制

敕具官某博士列於成均以講教為任爾以經明選
用往服厥官蓋尊其所聞以誘率學者汝之守也其
尚欽哉可

林希著作佐郎制

敕具官某麟臺著作之貳郎以詞學為之爾敏茂精
明久游書觀宜遷階品往服厥叙屬爾以文章之選
其休予獎遇之恩可

刑恕校書郎制

敕具官某典校秘藏之書旁求儒學之士尚思獎進
之意無忘砥礪之勤可

李常太常少卿制

敕具官某禮樂精微之致所以格上下而諧人神奉

常貳卿典領甚重爾聰明敏達久列書林宜進文階
往就茲位其務稱于厥職使節人心而和人聲者庶
有得焉非獨在於俯仰鏗鏘而已茲為朕志爾尚欽
承可

錢暄光祿卿

敕具官某酒醴膳羞之具以供宗廟朝廷之用典領
之任位在列卿宜得其人俾服予采爾明習吏事勞
閱有聞選於僉言俾踐厥職尚其祗飭無曠司可

楊汲大理卿王袞韓晉卿少卿制

敕具官某參理折獄之事主以列卿其選甚重爾續

習吏治閱試惟舊廷尉之選

少卿改云廷用云

是用屬汝

思明慎以稱朕恩可

陳睦鴻臚卿

敕具官某傳聲贊道之官所以賓接四方之使客位
在九列禮秩甚隆正名之初考擇惟慎爾以辭學材
諳列職史筵宜進文階往承厥序尚其祗飭以服朕
恩可

廉正臣董誥司農少卿制

敕具官某田畝稼穡之政倉庾委積之事典領之任
秩亞列卿官儀之新考擇惟慎爾明習吏治勞閱有

聞往貳大農是惟高選尚其祇飭無曠厥司可

賈青太府少卿制

敕具官某九賦頒受之政百貨貿遷之法典領之任
位次列卿肇正官儀考擇惟慎爾明習吏事閱試惟
舊徃共厥服汝惟克諧其躰朕恩尚思祇飭可

李立之范子淵都水使者制

敕具官某川澤河渠之政津梁舟楫之事置使典領
禮秩甚隆正名之初考擇惟慎爾明習吏治勞閱有
聞選於在廷俾踐厥職尚其祇飭無忘訓辭可

黃莘職方員外郎制

敕具官某四海九州之疆域山川風土之氣習載於
圖籍典以郎曹擢爾之材俾副厥位夫能使方國遠
近貫利同而材用便在爾能知其守可不懋哉可

杜純大理正制

敕具官某折獄詳刑之事朕所慎也正於理官叅贊
為重選於在列爾以材升聽察以情尚勤厥職可

李義內殿崇班制

敕具官某虞度管屯之事積累歲月之勤序朝位於
殿廷尚益思於奮勵可

元豐類藁卷第二十一

元豐類彙卷第二十二

查溪裔孫才道行思儀彥校刊

制誥

左僕射門下侍郎王珪追封三代并制

曾祖永贈開府儀同三司

敕禮取其稱故位益尊則事其先者世益遠今予良
弼褒命其親得上至于三世求之於禮豈非取其稱
執其官其曾祖其仁萬慈祥畜德甚盛蓋其為積也
厚則其流澤也廣故能開相厥裔為時宗臣百辟是
師正室是輔推功原大肇基自爾顯揚崇寵茲惟舊

章是用進爾之階秩在第一尚其不昧服此茂恩可
曾祖母尹氏追封燕國太夫人

敕優禮大臣厚其寵數所以勸在位之功德而共成
天下之治也宰相之任重矣尊榮光大上施于其三
世豈不即乎人情而稱其位序哉具官某曾祖母某
氏幽閑靜專躬蹈純德嬪于盛族壺彝是稱啓佑後
人任國幾政流澤所自宜極褒崇追命定封列于大
國光靈不泯尚服朕恩可

祖贄追封魏國公

敕夫下之忠乎上教有所自故上之仁乎下恩有所
延其軀相成治道所出惟吾股肱之佐共任天下之
重懲書寵秩施其祖廟所以慰其顯親之心稱其事
君之義具官某明允純篤德業惟茂義訓不倦彌遠
益彰維時聞孫實輔予治念功原始宜極褒嘉庸建
爾于上公俾受國于全魏歿而尚有知也其服朕之
厚恩可

祖母丘氏追封魏國太夫人

敕夫其先之畜德也厚則其裔之蒙澤也長故寵祿
在其子孫則褒榮施其祖禰獎功錄善必揆所繇所
以勸天下之成其家也具官某祖母某氏身蹈純行

嬪于令人教行閨門自隱而顯惟予哲輔實爾慈孫
質厥所原宜有加命一作嘉全魏大國從夫之尊服此
寵章尚綏爾後可

父準追封漢國公

敕朕敷求哲人以共大政隆名寵祿既俾集于厥躬
褒大推崇則又施其禰廟所以遂吾大臣欲顯其親
之志而開示在位予一人尊獎近輔之心具官某父
某材通世用行蹈天常德畜不施澤流及遠惟時有
子為國宗臣叅聽萬機人望惟允慶所自出朕惟
嘉并蔽四方漢為最大受茲封土承裕爾家可

母薛氏追封漢國太夫人

敕位有貴賤升降之等故禮有隆殺損益之差今輔
予聽斷萬幾之要在師長百官之任蓋列於廊廟名
秩既殊故追榮其親命數亦異茲惟故事其可易哉
具官某母某氏婦道以順母儀以慈言為壺羹動應
圖法能教其子為時宗工股肱朕躬王室是賴褒崇
之典既啓名城漢惟大邦改進封號尚宜寵渥永祚
厥家可

妻鄭氏追封楚國夫人

敕詩人之義君之夫人有委蛇之行河山之德然後

在尊位備盛服從其夫榮可以為稱施於世教所以
始人倫而出治道也具官某妻某氏淑茂柔明生于
令族動靜以禮協于經言相予宗臣慎其內行曾不
偕老永綏厥家湯沐之田既受方國有加追寵宜易
新封尚其光靈服我休命可

中大夫尚書左丞蒲宗孟追封三代并進封妻

制

曾祖穎士贈太子少保

敕朕稽千古以正百官惟尚書政本而左轄綱紀之
司延登哲人俾祗厥叙愍有加寵逮其重祖所以隆
崇大臣國之典也具官某曾祖某潛德西南在約彌
勵流光錫祚集其後昆總典中臺實輔予治東朝二
品是用命爾尚維幽漠服此茂恩可

曾祖母鮮干氏追封大寧郡太夫人

勅宗廟之數諸侯以五蓋任彌重者禮彌盛貴賤之
節然也今吾大臣追命及其三世與夫朝制豈異意
哉具官某曾祖母某氏作德於內以宜厥家啓相後
人預蔽國論按圖考地俾定爾封其尚有知服茲寵
號可

祖伸贈太子少傅

勅人本乎祖故吾加恩近輔褒榮其先至于累世豈不緣人之情而制為命數哉具官某祖某內含純明外蹈規矩流澤也遠有孫而賢進于中臺稔國綱轄善有所自朕惟汝嘉東朝之孫傳位為寵用賁幽宅尚其欽承可

祖母陳氏追封蜀郡太夫人

勅世德之積者久則發於其後者長故朕隆崇近輔而褒榮其先非一二世而止所以勸天下之善豈非傳哉具官某祖母某氏淑慎恭儉化行閨門啓其元孫持國綱要蜀惟爾二以定新封尚其如存膺此茂

繼祖母朱氏封閩中郡太夫人

勅夫位以德升禮以位叙不失其稱茲為義榮今吾崇進大臣而圖其先烈內外命秩亦惟其宜所以使上下之間公論惟允具官某繼祖母某氏婉嫕冲靜行孚于家祚爾之孫興以輔朕西南上郡愍有褒封垂聲贊書尚其不歿可

父師道贈太子少師

勅吾之大臣繇聰明材譎以有爵祿之榮予有命書賚贈賁其考庙所以稱其顯親之心慰其霜露之感

位不次授厥惟故常具官某父某忠薦純明德履惟茂壯謀循政聲列在人積厚慶隆及子而顯時予左轄司國紀綱惟流有原開跡自爾官師之貳名寵秩尊以告幽扁尚其祗服可

母陳氏追封潁川郡太夫人

勅人子之於其父母莫不有顯揚褒大之心惟任重秩尊得盡其志此隆名寵祿所以勸天下也其官某母某氏經德履善宜其家室錫羨流祉在爾後人時予宗工仕國綱轄陪京望郡俾定新封服我命書尚其不泯可

妻陳氏封河東郡夫人

勅朕援用天下之材以為共政之臣就位之初恩數禮秩所以尊榮光大之者上施其祖禰而旁及於閭門蓋任屬之者重則褒隆之者其可以不異哉其官某妻某氏言容功德柔閑懿恭嬪于令人休有華問惟時哲輔進秉國成相助之勤爾効彌顯改擇加郡登崇號名尚宜厥家永綏寵祿可

陸佃兼侍講蔡卞兼崇政殿說書制

勅朕於書無所不學於天下之事無所不攷而不敢自以為足故設置講解之官使以先王之六藝日陳

于前朕於求多聞以建事之心可謂勤矣具官某好古知經宜在此位夫尊其所聞以懋厥職茲為爾守其尚起哉可

蔡下改講
解作議說

徐禧給事中制

敕有殿內之臣職在於平奏述詳命令糾其違者而止之覆其是者而行之至於決獄官人條陳法式之事莫不當攷察焉其任可謂重矣具官某以財進拔典執邦憲茲用推擇俾踐厥位惟精敏不懈可以周閱讀惟忠實不撓可以司論駁朕方觀爾之效爾尚慎於厥脩可

鍾浚將作少監制

勅具官某繕脩興造程工督作之任不可不厲之其人位視九卿禮秩甚寵正名之始考擇惟慎爾以材選往貳厥官尚其祗承以允收拔可

蔡燁河東運判制

勅具官某分部而使雖以將漕為名然實在於撙庶務之予奪察群吏之能否參予任屬選授其艱以爾為能俾承厥序夫均通貨食使物有羨贏審覈幽明使人知勸畏茲為爾守其往懋哉可

供備庫副使董琰等十一人轉官制

勅具官某等西南之變待阻且遠眺踰溪谷負誼干
誅王師鼓行舉其巢穴斬獲摧陷爾預奏功第賞有
差尚惟祗服可

待制王堯臣知單州制

勅提將之符韻制一道使紀律明於士衆忠實紀於
朝廷然後為國藩垣能稱其位具官某統治晉陽宜
知其任而西伐之卒比有逆亡繼形奏陳皆以疾苦
無直繩肅下之誼有浮言罔上之迹雖付之刺督考
驗甚明而既更詔恩法當貸爾俾仍近職往守偏州
尚自省循茲為薄責可

鄧忠臣母周氏封縣太君制

勅具官某母某氏爾子忠臣有勞應賞願更寵典以
啓爾封俾錫命書茲為異數尚惟祗服以稱茂恩可

杜常兵部郎

勅具官某朕為保伍之法寓戰陣之教欲使兵與農
合庶幾先王之迹夏官之屬實參典領以材擢爾往
祗厥序夫能獎誘服田之人悅趨講武之政馴致有
漸而彌綸不疏惟無廢爾之勤可以承朕之志可

李士京韓宗文大理寺主簿制

勅具官李士京等察治犴獄之官勾稽簿領之事往

祇選用無懈厥修可

許懋兩浙運副制

勅具官某朕擇遣使者分部而治雖以將漕為稱然寔總民政之舉措察吏屬之能否蓋連數十城之地舉而屬之其選豈不重哉爾詳練敏明宜服予采蓋爾之職非止於督賦斂斷獄訟而已惟除苛熄擾可
以使民遂其宜惟務實去華可以使吏馴其行宣恩德而美風俗待爾能善其官可不勉歟以祇朕命可
內殿承制段綽等知州制

勅具官某州有兵民之寄而地在疆場之間則當擇
用材武之臣屬之守禦之任爾以能選往祇厥服尚
思緩靖以稱簡求可

宗室承操新婦王氏進封國夫人制

敕親愛之而欲其貴富朕於公族皆推是心寵數徽
章施於閨壺茲惟故事朕敢忘哉具官某新婦某氏
作合宗藩躬有馴德啓茲全國用進爾封以致朕尊
獎近屬之恩尚懋爾服承休顯之稱可

宗室克懼復官制

勅具官某屬在近親享有榮祿以愆坐法亦既再期
稽于故常宜服位等勉思祇飭稱此茂恩可

無不錄况議勞數實有大於此者其於信賞朕敢忘哉具官某比自臨洮率衆躬將摧殪醜虜恢復故疆鼓行羗中屢以捷告故按閱朕用寵嘉秘殿榮名便藩留務兼是茂渥以獎爾庸其往懋哉益思來効可

李靖臣王存趙彥若曾肇轉官制

勅惟朕祖考成功盛德覆被天下固非文字可得而名然史記冊書國家之典上以紀先帝言動之迹下以及群臣善惡之實傳之萬世宜有論次具官某以文學選用真誠信實朕惟汝嘉是用褒進尚其以稱朕恩可

李舜舉等轉官制

勅具官某朕惟先帝功德之殊宜見之方冊故詔撰儒臣屬之論議而爾於其官次與有祗事之勤亦既書成例當褒錄進升位等其尚欽承可

皇伯滕王第十六女封縣主制

勅具官某第十六女親在近屬生而懿柔宜開縣主之封以榮湯沐之號予惟惇序爾尚欽承可

元豐類聚卷第二十一

李德明遙郡團練使制

勅具官某擢甲執兵人之重任賞信而速所以勸功爾忠力武材稱于種落往殲醜類屢以捷聞苗爾之勞進位二等益思奮勵以待異恩可

陳景等尚書省主事令史

勅其中臺政本主曹事治文書亦不可不屬之其人爾往懋哉皆仍舊秩可

折克行彭保轉官制

勅具官某朕惟羗之猖狂內相賊虐致天之罰爰命六師開通道塗收復城聚摧堅獲醜爾功居多蓋夫宣賞之行速則衆勸是用進爾之秩以激士心尚有不次之恩以待非常之効可

程嗣恭祖無頗程博又開封府推官制

勅具官某開封天下之聚俗雜五方之民蓋巧僞繁興獄訟滋出贊治之任攷擇維艱以爾爲能俾祗厥服夫慈惠足以煦養惇弱剛嚴足以帖伏奸強然導民之方尚有可識使風俗有以粹美而四方有以觀則往助爾長其尚懋哉可

李憲武勝軍節度觀察留後制

勅王師西出土大夫皆奮力行陣有尺寸之功者朕

無不錄况議勞數實有犬於此者其於信賞朕敢忘哉具官某比自臨洮率衆躬將摧殪醜虜恢復故疆鼓行羗中屢以捷告故按閱朕用寵嘉秘殿榮名便藩留務兼是茂渥以獎爾庸其往懋哉益思來効可

李靖臣王存趙彥若曾肇轉官制

勅惟朕祖考成功盛德覆被天下固非文字可得而名然史記冊書國家之典上以紀先帝言動之迹下以及群臣善惡之實傳之萬世宜有論次具官某以文學選用真誠信實朕惟汝嘉是用褒進尚其以稱朕恩可

李舜舉等轉官制

勅具官某朕惟先帝功德之殊宜見之方冊故詔擢儒臣屬之論議而爾於其官次與有祗事之勤亦既書成例當褒錄進升位等其尚欽承可

皇伯滕王第十六女封縣主制

勅具官某第十六女親在近屬生而懿柔宜開縣制之封以榮湯沐之號予惟惇序爾尚欽承可

元豐立類彙卷第二十一

元豐類藁卷第二十二

查溪喬孫才道行思儀彥華祚校刊

制誥

吳居厚京東轉運副使呂孝廉轉運判官制

勅具官某朕進拔能吏以督視一踞蓋州縣政令之舉措公私貨食之斂散莫不任焉得人之難攷擇惟慎以爾幹敏閱試惟舊用是茲土東部屬以使事夫施於民者厚而刑罰清求於民者約而財用贍使德流澤通而風化輯穆以稱朕憂憫元元而勵精庶務之意爾其勉矣往服訓辭可

西頭供奉官武遂等轉官制

勅具官某王師西出以討不庭爾能殲擊兇殘恢復州聚錄功增位不以次迂勉服朕恩益思奮勵可

曲珍四廂都指揮使絳州防禦使制

勅具官某羗之獸心內相危害王師薄伐蓋將天威爾能躬將士徒摧豎殪敵斬捕甚衆鼓行無前周衛典軍之官名城禦侮之寄兼是寵數以疇爾庸尚有異恩待爾來效可

文思使張俊等遷官制

勅具官某朕爰命六師奉辭西伐爾能效其忠勇深入羗中獲醜摧堅以捷來上躡陞位等以懋爾勞其能繼於前功朕豈稽於信賞可

文及甫吏部員外郎制

勅具官某朕正百工之名而將責其定効其官吏考擇允慎天官之屬僉曰汝能其往欽哉無忘勉勵可
許安世都官員外郎制

勅具官某徒隸傭役之人典其廢置而時其迁序主以郎吏其選甚高爾蚤以敏明升華儒館宜增階等往涖厥職尚思勉懋以稱簡求可

皇伯宗諤贈太尉韓王制

勅王者之於天屬覆之以光榮而恤其死喪之戚所以本人倫教天下也具官某以德則循理小心始終無悔以功則受命仁祖趣定儲極以位則渠門赤舄任兼相將以爵則躡於五等列爲真王以親則先帝之從父兄而余曰伯父顯名美實福祿之全可謂盛矣奄遘癘疾至於不起余聞震悼臨奠致哀再不御朝以伸情禮是用追加書贊進秩上公啓此大邦隆崇號稱余於親親之恩可謂備矣尚惟不昧服此寵章可

齊宗壽三班借職制

勅某有司言爾滿歲當遷而獎進爾勞又當躡等是用加茲寵渥列於命秩往惟祗服以稱甄收可

交州進奉使副梁用律洛苑副使阮陪太常博士制

勅具官某策名蕃服納貢王庭將事之勤朕用甄錄進其位等茲惟舊章往稱茂恩毋忘祗恪可

皇伯宗惠新婦郭氏進封郡夫人制

勅具官某新婦某氏司宗於屬爲近於位爲重王於爵爲貴蓋禮秩之見於外者旣寵則施於內者宜殊爾德性淑慎稱其家室爰加象服之盛以大鶡巢

之榮其尚欽承茲爲異數可

賈昌衡知鄧州

勅記舊俗者稱南陽之民夸奢上氣力難制御今其餘習殆尚有存者故有邦之任朕不輕以屬人具官其中外踐更令聞惟舊茲用攷擇往分彼土蓋穰澆之間雖俗雜難治然教民敦本興於好善召信臣杜詩之遺跡在焉使農桑勸而風俗厚爾尚思繼于前人其往懋哉無替朕命可

李良輔知廬州張竝陝州崔度蔡州王說徐州制

勅具官某朕董正治官自朝廷始至於六服群吏莫不考循其名以督課其寔夫宣恩德以逮下厚風俗以承上其選爲重者非長民之任乎爾惟其人屬以茲位蓋奉職遵禮以有循良之稱苟能自勉則寵勞錄最以明國家之典朕敢忘哉往欽厥司方稽爾效可

知泉州陳儼梓州吳幾復湖州唐淑問並任制勅則具官某吏之奉職循理能附其民使之久於其官上下相安而治化易洽今爾之材宜於旣試俾仍舊服以懋厥庸尚體朕恩益思遠効可

吳安特太僕少卿制

勅具官某車府廐馬牧監之政典以卿士其選甚高
念非得人曷贊其治爾材質明茂嘗更器使以憂去
位既終喪紀宜更階等往貳厥官其勤夙宵以敏功
寔可

菊襲二右班殿直制

勅具官某夷獠背恩賊殺命吏爾能擊刺醜類獻其
首級宜陞位序以獎爾勞尚勵壯圖益思來効可

馮正符借職制

勅某西南夷背德獸心敢闕邊隙爾能通宣兩誼

勅軍謀宜進官榮厲之守護勉思奮勵無替前功可

奉議郎景思誼授東上閣門使廊延第一副將制

勅具官某西討之兵有陳戰之功著朕無不錄爾能
致其材武奮擊黠羗克敵摧鋒屢以捷報疇庸較實
宜有異恩介上閣之使名貳連營之將領茲爲獎拔
蓋匪常科尚勵壯謀益思來効可

皇太后親姪高公繪通州刺史高公紀達州刺

史制

勅具官某等朕有顯親之心欲形於天下故加恩母
黨所以本人情隆世教也爾等皆於外家寔在近屬

持身恭慎朕所識察刺臨州郡典視祠宮秩寵地優
並膺拔用尚勵爾欽承之志以稱余廣愛之仁可

梅福封壽春真人制

勅某在漢之際數以孤遠極言天下之事其志壯哉
而家居讀書養性卒遺俗高蹈世傳爲仙今大江之
西寔存廟像禱祠輒應能澤吾民有司上聞是用錫
茲顯號光靈不泯其服朕恩可

卓順之直翰林醫官局等制

勅某稽其醫事而制其食先王之典也屬以愛主之
疾爾能調治有瘳是用寵以官榮進其服品往遵醫
職無替恪恭可

成卓閣門祗候制

勅具官某長川廣谷之間與蠻夷壤接爾處徼巡之
任能練達人情輯寧疆候守邊之臣稱爾之材謂難
代易是用進爾職於上閣而俾恭其舊服朕於念勞
獎善之心可謂至矣其思綏靖以稱朕恩可

溪瓊本族副都軍主等制

勅某守邊之臣屬爾奉其方物來獻闕庭朕惟爾嘉
是用命爾還其種落典治一軍往勵忠勤益思來効
可

景青宜党令支團練使阿星刺史制

勅某爾有摧鋒克敵之功而又奉其方貢來見闕廷
寔勇且忠法當旣進兵團之任以寵爾勞往其祗服
益思來効可

論龜巴柯族軍主結廝雞柯族副軍主制

勅某爾父有嚮慕中國之心歿而不遂其志屬爾于
朕願備一官朕甚憐之是用加命爾秩往其祗服益
勵忠勤可

阿憐官捉廝雞並本族副軍主制

勅某爾父效貢來庭因得進見以爾為請願備一官

朕知其尊嚮中國之勤是用錫爾命秩往思忠恪以

稱朕恩可

內一段作爾父因其種人入脩貢職以爾為請

溫高知欽州制

勅某州有兵民之寄而地在疆場之間則常擇用材
武之臣屬之守禦之任爾以能進往祗厥服尚思綏
靖以稱簡求可

劉安等中書省主事令史制

勅具官某等右省詔命之所出也吏治文書非習法
令孰成事不能稱其任爾等皆以命秩往祗乃服無
忘恭恪以慎厥司可

知穎昌府韓維再任制

勅朕待天下之士未嘗不篤於恩况於故舊之臣朕所加厚則於順遂其意夫何愛哉具官某昔在官朝事朕左右今列職秘殿位寵自親而便其故鄉屬以州任雖歲既再滿然重奪其志是用仍其舊服俾祗厥官以致朕求舊之仁尚勵爾在公之義可

米贊等轉官制

勅具官某爾以衆西出討擊羗虜斬獲首級有司以聞是用甄錄爾功躡陞位等往其勉矣益勵壯圖可
雍王顥乳母宋氏贈郡君制

勅某氏惟雍王顥於國屬之親且愛而爾有乳養之勤故其生也錫之爵邑其歿也飾以恩榮是用追命爾封進於列郡以光幽窆尚服寵章可

豐稷吏部員外郎制

勅具官某尚書正本而吏部天官所以綜敘群材以成天下之治郎於典領其選甚高是用擢爾之能俾叅厥服朕方勵精政理而務在得人爾惟懋於其官庶幾承朕之志可

呂和卿考功員外郎制

勅具官某計群吏之治而明黜陟之法臺郎典領列

於左曹拔用爾能俾參厥位夫能善於其職固將圖爾之勞可

韓晉卿莫君陳刑部郎中制

勅具官某刑者所以助治而聖人之所尤慎中臺參綜郎選甚高爾曉達吏方宜在茲任夫惟篤於明恕以副朕欽恤之心其往懋哉以祗厥敎可

范諤知密州范子諒濮州劉士彥泗州制

勅具官某守土之官民事所屬朕方勵精庶政之日尤務在於得人攷擇於朝爾往惟允夫能宣布恩德以拊循吾民而綱理風俗則為能稱其任爾其可不勉歟

陳端翰林醫官制

勅某爾父易簡以醫入侍處劑湯液有勞可旌進遷爾官用申獎寵往惟祗恪以稱朕恩可

沈士安西綾錦副使制

勅具官某明習禁方以醫入侍處劑湯液有勞可旌進貳使名以申獎寵往承厥叙無替爾勤可

王瑛楊宗三班借職制

勅某爾等備吏屬治文書勤亦久矣是用從爾之請錫之命秩往惟祗飾以稱朕恩可

王從臣知岢嵐軍制

勅具官其崇築壘培本以輯治軍旅及四方既平而
後守之臣實任民事列於有土之官矧嵐谷並邊寄
存尤慎爾以選擇往祗朕命夫能開示恩威以惠養
吾人而懷附異俗則為善於其職尚思爾守無替訓
辭可

呂升卿館閣校勘通判鄆州制

勅具官某鄆有提封之廣生齒之衆於東為極郡贊
貳政理選授惟艱爾蚤以藝文列於辭館宜更階
往承厥敘無忘祗慎以服朕恩可

成慶民管勾永興等路常平張太寧提舉秦鳳
等路常平制

勅具官某等朕為保伍之法寓耕戰之政典農之官
屬以兼領蓋分路而治隄制或難固當從宜使之易
地是用命爾換部而使夫能利力田之民脩講武之
令各奮爾庸不失其職則為能體朕意其尚懋
哉往遵廼服可

中行知無為軍制

御史有言責之臣朕之所取信也言而欲遂其忿闕
之私乃至於失是非之當豈獨朕於取信失其所屬

蓋汝之以言為職誼豈當然俾去憲臺兼榮職秩往
臨軍壁宜體朕心

駙馬都尉王師約轉觀察使制

朕於媢戚之臣未嘗不篤於恩意然其積勤累善不
罹罪悔而七歲一遷其官則必循用舊章蓋爵賞者
天下之至公朕不敢以私撓法也具官某出于景族
選上貴主有淑慎之行無怠肆之失第其闕閱宜得
叙陞廉按一州以為爾寵蓋爾自初仕迄此再增厥
位皆以歲滿應於遷格則朕之謹于信賞爾之安其
常守上下之際豈不兩義俱得哉無忘勉勵以求保

名可

崔象先等帶御器械制

勅具官某乘輿所在供御之物無一不備具者故鎧
甲弓矢屬之以從者亦不去於側非左右親信惡足
以任此哉爾給事帷舊宜就茲列益思祗恪以稱厥
官

蔡京起居郎制

勅具官某王者言動必書豈獨思為後嗣法哉施之
於已固欲擇語默慎行止也執簡肆筆必也屬之其
人爾之弟卞既已列於右史今復不次用汝使記予

事位於左省士之在此選者希矣而爾之叔季並直同升其於榮遇世罕及者朕恩若此則汝之自効宜如何哉其懋厥脩以報所受可

王中正種諤降官制

朕大興士衆屬爾等以伐羗固將舉其巢穴非徒卻勇收並塞之地而已兵西出則近而爾等東繇綏德回遠之路以疲士馬費芻粟致功用不集中正議既不審又約有分地當攻其左而不能奪擊以殲除醜類夫軍賞吾必信而罰亦安得已哉是用按爾之罪降秩有差其體寬恩尚思報稱可

封曹諭母制

曹氏國之外屬而諭實爾之出諭既有列於朝亦有追榮及爾是以封之列郡秩以寵名茲為異恩以光幽窆

張知均州制

嶺之西南桂為劇部外有溪居海聚之民壤錯內屬拊巡填守鉅可屬非其人爾比選于朝往備茲任而內不能統齊士吏外不能綏靖華夷致茲繹騷自于邦憲奪其美職處爾偏州茲惟朕恩無忘思省可

元豐類藁卷第二十二

